



Акафист святому преподобному и богоносному отцу нашему Киприану Стороженскому

Кондак 1

Избранный наставниче и предивный пред Богом о нас попечителю, во всяком благом устремлении скорый помощниче и пасхальной радости Духа Свята испросителю, преподобне отче Киприане, возсиявый земли Ладожской, аки чудный свет; многим воздержанием житие твое украсивый на земли, сего ради и венцем венчаный на Небеси, яко прехвальный подвижниче жития строгаго; похвальное воспеваем ти пение. Ты же, имеяй велие дерзновение ко Всесвятей Троице, от всяких нас бед свободи, с любовью зовущих ти: Радуйся, преподобне отче Киприане, чудотворче и дивный молитвенниче о душах наших.

Икос 1

Ангелом Творец, благоплодную бо доброту сердца твоего провидев, призва тя, всеблаженне отче наш Киприане, от чреды разбойников морских во служение Себе и людям Своим в лице преподобных, благодатию своею преобрази душу твою, озари ты и дарова ты миру в

утешение, праведных дел во утверждение,
промысла и воли Божией во исполнение. Мы же,
обряще сокровища сия, с радостию вопием ти:
Радуйся, воине Христов добропобедный,
Радуйся, Живаго Бога служителю благий и
верный.

Радуйся, на высоту самоотверженной пламенной
любови восшедый.

Радуйся, яко светло озаряеши всех ублажающих
тя,

Радуйся, во грехе отпавшим от Христа
возвращение ко Спасителю.

Радуйся, истиннаго просвещения и
христианскаго благочестия ревностный
насадителю,

Радуйся, кающихся грешников, сирых и убогих
милостивый покровителю.

Радуйся, преподобне отче Киприане, чудотворче
и дивный молитвенниче о душах наших.

Кондак 2

Видев тя на озере Ладожском и иных просторах
водных разбоем и грабежами промышляющего,
святой преподобный Андриан Ондрусовский,
возвести ти пагубу пути сего и к покаянию и
примирению со Христом подвижни, ты же,
Киприане, глаголом богоноснаго старца следуя,
отвратился еси от мерзости греховней и начало
благое в Бозе положил еси, воспевая

просветившему тя Всеблагому Спасителю песнь покаяния и благодарения: Аллилуйя!

Икос 2

Разум и вся чувства твоя в вере Христовой утвердил еси, добромысленный Киприане, советом старца Андриана внимая, слезами горячими покаяния глубочайшего омыл еси грехьми оскверненную душу твою, евангельского образу благоумного разбойника последовавше, олицетворяющего всех верующих и упование на Милосердие Христово непреложно возлагающих. Сему же и нас, грешных и неразумных чад Отца Небеснаго, настави, да славим тя, заступниче наш и покровителю, славословиями сими:

Радуйся, советом нечестивых не покоривыйся.

Радуйся, дом добродетели на камени заповедей утвердивый;

Радуйся, фараона мысленнаго в море смирения потопивый;

Радуйся, противу мира, плоти и диавола брань мужески подъявший;

Радуйся, венец победы от Подвигоположника приимый;

Радуйся, Господа серафимскою любовью возлюбивый;

Радуйся, чести безплотных на небеси сподобльшийся;

Радуйся, идеже Христос в телеси, тамо и ты пребываеши:

Радуйся, преподобне отче Киприане, чудотворче и дивный молитвенниче о душах наших.

Кондак 3

Сила велия любви ко иноческому житию явися в тебе, отче Киприане, яко некий огонь божественный в душе твоей распалемь. Сего ради, оставив мир и вся сокровища твоя, неправедно добытыя, покаянными слезами омывая велию скверну греховную, на служение Христово уготовал еси душу твою, притекл еси в пределы Сторожевския, иже на брезах езера Ладожского суть, благодарне за благодать примирения поя на всякое время Всемилосердному Иисусу: Аллилуиа.

Икос 3

Имея крепкую веру, и возжелав спасения вечнаго, пустынный мыс возлюбил, блаженне Киприане. Крест святыи водрузил на нем и часовню поставил с малой хижиной; и всем прежним соратником твоим по промыслу разбойному, яко облак светел и росоносен явился еси, пламень праведно движимаго на ны за грехи наша гнева небеснаго утишающий и зной страстей душевных и телесных охлаждающий, иссохшия сердца наша

оживляющий и плоды добродетелей приносить
помогающий всем воспевающим ти таковая:
Радуйся, всего себя водительство Божию
предавый;
Радуйся, узкий путь монашескаго жития
избравый;
Радуйся, древних подвижников усердный
соревнителю;
Радуйся, добродетелей христианских рачителю;
Радуйся, любовь велию к Богу показавый ;
Радуйся, в силе Его преспевавый;
Радуйся, пустыннолюбцев в искании Бога
усердный сподвижнице;
Радуйся, за враги своя и за вся теплейший
молитвеннице;
Радуйся, преподобне отче Киприане, чудотворче
и дивный молитвеннице о душах наших.

Кондак 4

Бурю лютых искушений всеусердным упованием
твоим на Христа Распятаго победил еси,
богоблаженне Киприане, и в новосозданней
обители с радостию трудныя подвизи
богоугодныя подъял еси, яко крест нищетолюбия
от Господа добровольно на рамена свои приял
еси, в Богообщении, во благодати и чистоте
пожившие, житие твое благоугодное с неземным
умилением и даром слез в образ подражания
нам оставил еси. Мы же, дивящися Божию

попечению о тебе, святой отче, с надеждою вопием Вседиржителю Нашему: Аллилуиа.

Икос 4

Видевше по Бозе житие твое, преподобне отче, ближния и дальния прихождаху к тебе, единии благословения ради и наставления твоего, друзии прошения ради молитв твоих, инии - во еже обитати с тобою, овии воззрения токмо ради на пресветлое лице твое. Ты же, любвиобильне, содержа во уме слово Господне: грядущего ко мне не изжену вон, никогоже отринул еси.

Темже прими от нас песнь сию:

Радуйся, непостижимую действующую в тебе силу Божию явивый;

Радуйся, звездо, путь ко Христу показующая;

Радуйся, заблудших исправление от путей беззаконных;

Радуйся, благодатный врачу убогих и немощных;

Радуйся, щите веры, притупивый стрелы лукавых;

Радуйся, молние, разгоняющая враги видимыя и невидимыя;

Радуйся, поборниче Христов, в мужестве твердый и неодолимый;

Радуйся, столпе Святыя Церкви Христовы непоколебимый;

Радуйся, преподобне отче Киприане, чудотворче и дивный молитвенниче о душах наших.

Кондак 5

Божию милость видим на тебе, преподобне отче Киприане, яко предстательством твоим пред Всемогущим Господем Нашим путников, по водам шествующим, от бури избавляеши, корабли от ярых волн по молитвам твоим укрываеши, яко щитом от смерти благодатным Божиим заступлением окружаеши, в покаянии утверждати всех не уставаеши. Сего ради и мы благодарственно вопием о тебе Всемудрому и Премилосердному Господу: Аллилуиа.

Икос 5

Видевши обитель твою, всехвальный отче Киприане, велием, но с любовью подъятым трудом, созданную, красующуюся миром и иноческими добродетельми, московский святой благоверный царь Феодор Первый радуясь о Милосердном Спасе Нашем, новый светильник в земли Российской возжегшем, и дарами и грамотами одари богоспасаемый монастырь твой. Мы же славим Всесвятаго Господа Нашего и тебе, прехвальне Киприане, величаем сие: Радуйся, яко красная мира сего ни во что же вменивший; Радуйся, в тиши лесной спасение искавший;

Радуйся, ко Единому Господу очеса своя выну имевший;
Радуйся, во вся дни живота своего упование свое в Нем утверждавший;
Радуйся, всякия правды Спасовой исполнению послуживший;
Радуйся, Христову веру и благочестие в стране нашей утверждавший;
Радуйся, таинству спасения людей российских послуживший;
Радуйся, сего ради всем благовестие Христово им возвестивший;
Радуйся, преподобне отче Киприане, чудотворче и дивный молитвенниче о душах наших.

Кондак 6

Проповедник истины и пастырь добрый явился еси, всехвальне Киприане, одебелевшия сердца к покаянию обращая и сострадати немощным душею навик, яко приял еси от Господа любовь нелицемерну, тою и наша сердца возгрей воспевати присно Богу во умилении и исповедании теплом, и ближнему во благое послужити настави ны, вопиющия о тебе Госповеди: «Аллилуйя!»

Икос 6

Воссиял еси светом любве небесныя всем ближним твоим, прехвальне отче Киприане, яко

воистину пастырь добрый людем твоим явился еси, веру живую и действенную в сердцах возгревая, умиления дар подая и ожесточение сердечное милостивно врачуя, братий твоих пастырской мудрости обучил еси, еже сострадати всякому грешному человеку тех наставляя, и друг друга тяготы носить поучая, сего же ради с надеждою вопием ти сице:

Радуйся, чистоты сердечной изрядное умножение;

Радуйся, ревнующим о правде пречудное укрепление;

Радуйся, дивное сияние вечней истины Евангельския.

Радуйся, великий предстателю бедствующим в море житейстем;

Радуйся, благодатный утешителю всех имя твое славящих;

Радуйся, скорый послушнице всех с верою тя призывающих;

Радуйся, сущих в пленении освобождение;

Радуйся, от глада и болезней наше спасение;

Радуйся, преподобне отче Киприане, чудотворче и дивный молитвенниче о душах наших.

Кондак 7

Хотя Человеколюбец Господь явити в тебе, преподобне отче наш Киприане, свое неизреченное к людем милосердие, показа тя

яко воистину светило богосветлое: ты же исполняше завет святого старца Андриана был для всех отцем и наставником, врачом немощей духовных и телесных. Темже, сиянием подвигов твоих просвещены и хлебом учения твоего насыщени, тебе усердно величаем и прославльшему тя Христу вопием: Аллилуиа.

Икос 7

Дивным и святым подвигом пречуднаго Андриана Ондрусовскаго, житию его безпорочно последовал еси, преславне отче наш Киприане.

Братии служением неленостным, пощением, бдением, еще же и плоти твоем, умерщвлением: мы же видяще толикия труды твоя, спасения ради подъятыя в хладнем полноцнем краю подъятыя, величаем мужество и мудрость твою духовную и таковыя похвалы с любовью приносим ти:

Радуйся, в подвизех древним пустынником поревновавый;

Радуйся, мучительства страстей мудре избежавый;

Радуйся, единому Богу служити восхотевый;

Радуйся, мраз и глад мужески претерпевый;

Радуйся, любовью Божественною душу и тело твое согревавый;

Радуйся, злострадания телесная паче плотскаго упокоения возлюбивый;

Радуйся, яко пици безсмерныя ныне причащаешься;
Радуйся, яко упокоением Небеснаго Царствия ныне наслаждаешься;
Радуйся, преподобне отче Киприане, чудотворче и дивный молитвенниче о душах наших.

Кондак 8

Странно маловерующим слышати, како преобрази тя Всемогуций Господь и из ветхаго в злобе своей человека сотвори тя, всехвальне отче Киприане, воистину светило богосветлое: во Христе чадолюбивым отцем и смиренным наставником, немощей духовных и недугов телесных врачевателем, сего же ради молим тя: испроси нам вся потребная к животу и благочестию, избави нас от бедственных падений, бесовских искушений, болезненной печали и во Царствие Небесное приведи ны, яко вовеки с тобою сподобимся Господеви воспевати: «Аллилуйя!»

Икос 8

Весь еси милость неоскудевающая и подвига зеркало нетускнеющее был еси, богоносне отче наш Киприане. Видяще же ревностное по Бозе и жестокое житие твое и братии в пределах полноцных, непрестанно в трудех и пощении подвизающихся и ходящих в рубищных и худых

одеждах, нецыи от инок но паче ревностию
духовною горяще и во обители купно с ними
подвизатися желающе, приношаху ту имения
своя на пользу общую; темже здателю тоя
возглашаем тако:

Радуйся, шествовавший путем трудным и
тесным;

Радуйся, возводяй других к Обителем
Небесным;

Радуйся, надеждо светлая в нужде и обстоянии
сущих;

Радуйся, покровителю сирых и крова
неимущих;

Радуйся, обидимых вусемудрый и благостный
утешителю;

Радуйся, гонимых всемилостивый заступниче и
покровителю;

Радуйся, в малом верных выну укрепляющий;

Радуйся, возлюбивших Господа окормляющий;

Радуйся, преподобне отче Киприане, чудотворче
и дивный молитвенниче о душах наших.

Кондак 9

Всякия похвалы и славословия достойна есть
любвы твоя, прехвальне Кириане, яка крепчае
Смерти бысть, ибо Бога бо возлюбил еси всею
душею и крепостию твоею и ближняго твоего,
яко сам себе и множае паче себе, яко еще на
земли сый, ояденевшия сердца ко Господу

обращал еси, темже и ныне ходатайства твоего просим, память твою чтущии верно, вопиюще с надеждою на предстательство твое Господеви: «Аллилуйя»

Икос 9

Витии любомудрии прославляют славных мира сего деяния, мы же твоим житием честным красуемся, святче Божий, и прославляем преставление твое святое и многая чудеса, тобою содеянная сразу же по кончине твоей и содеваемая от рода в род: воистину бо не вотще чудотворец именуешься, преблаженне, и достойно слышиши хвалебныя песни таковыя: Радуйся, в добродетелях и почитании старших наставляющий;
Радуйся, страх смерти и болезни в душах наших побеждающий;
Радуйся, благодатную силу исцеления просящим подающий;
Радуйся, от проказы греховныя нас избавляющий;
Радуйся, радостию и любовью жаждущих напояющий;
Радуйся, светом веры и надежды нас озаряющий;
Радуйся, в шествии путем заповедей Христовых укрепляющий;
Радуйся, несение ига крестнаго пречудно

облегчавающий;

Радуйся, преподобне отче Киприане, чудотворче и дивный молитвенниче о душах наших.

Кондак 10

Спасительнаго твоего подвига, угодниче Христов, достиг скончания, и душу твою в руке Божий предал еси, сподобился достойно встати у Престола Вседержителя, идеже со всеми святыми предстоиши во славе невечерней, Тем же и нам, святую память твою, преподобне Киприане Сторожевский, почитающим, твердую руку помощи твоея подаждь и грехми присно погружаемых от смертоносных глубин изведи и прочее жития время в покаянии истеннем скончати помози и от вечнаго гнева спаситися сподоби, поющим: Аллилуиа.

Икос 10

Стену несокрушимую и утверждение непреоборимое обретоша ты, богоносне Киприане, православнии людие не точию края Ладожского, но и всей вселенней, ибо по скончании иноческаго и воистину равноангельнаго жития твоего, угодниче Божий, по всем концем земли чудеса совершаеши еси изрядна и преславна, предстоя Богу, тебе подавшему залог Божественен и венец нетленен и славу вечную. Сего ради вернии воспевают

тебе:

Радуйся, пресветлый светильниче, возсиявый на тверди Небесней;

Радуйся, в немерцающем свете с Господем пребываяй;

Радуйся, теплый ходатаю у Престола Господня о всех, чтущих святую память твою;

Радуйся, Небесный покровителю страны нашея, града и храма, идеже почивают святыя мощи твоя;

Радуйся, заповеди Господни творити с радостью о Спасе научающий;

Радуйся, окамененная сердца во источницы милования обращающий;

Радуйся, возлагающим по Бозе упование на тя пособствующий;

Радуйся, от врагов видимых и невидимых всех нас обороняющий;

Радуйся, преподобне отче Киприане, чудотворче и дивный молитвенниче о душах наших.

Кондак 11

Пение хвалебное приносим ти, богоблаженный отче наш Киприане, и молим тя усердно, испроси, святче Божий, у Предвечного Отца Небеснаго, да обрящем в житии сем вразумление и дар покаяния, в Истине Христовой утверждение и спасительной благодати стяжания, помози нам, небесный

заступниче наш, твоим добродетелям подражати, надежду твою на любовь и правду Божию стяжати, да возможем богоугодно пети Создателю нашему: Аллилуиа.

Икос 11

Светоприимный и богосветлый светильник сущим во тьме неразумия людем русским, Всеблагим Господем возженаго, зрим тя, всеблаженный отче наш Киприане, возсиял бо еси светом добродетельнаго жития твоего, (егда оскуде на Руси преподобный), и наставил чад твоих духовных и ближних еси к разуму истинному, вся зарею словес Божиих ум просветил еси. Сего ради простим тя, угодниче Христов, настави и нас бытии истинными учениками Спасителя Нашего и прими благосклонно возносимья тебе похвалы сия:
Радуйся, многих сынов Российских из бездны греховныя восхитивый;
Радуйся, тех на путь покаяния наставый;
Радуйся, не токмо верных, но и неверных любовию объявый;
Радуйся, милование Христово к немощным и грешным проповедавый;
Радуйся, души от горькаго сна лености и бездеятельности возбуждаяй;
Радуйся, искренния слезы умиления и радости из потухших очес источаяй,

Радуйся, сердца окамененныя благодатно
исцеляющий и умягчающий;
Радуйся, к действительному исправлению
грешники скоро побуждающий;
Радуйся, преподобне отче Киприане, чудотворче
и дивный молитвенниче о душах наших.

Кондак 12

Благодать дарова ти обильную Христос Бог наш,
святе Киприане, во еже путеводити люди ко
спасению. И ныне источают оную честныя мощи
твоя, недугующия душею и телом исцеляя.
Почитающеся же тебя с верою, надеждою и
любовию, молим убо тя: предстательством твоим
у Спаса Христа помози нам, преподобне отче,
благочестно на земли пожити, да и Царствия
Небеснаго сподобимся, поюще о тебе
Всемудраму Господу Нашему: Аллилуиа.

Икос 12

Поюще твоя чудеса и в Бозе житие твое, святыи
преподобный отче наш Киприане, недоумеваем,
како достойно изрещи сладость благ, ихже
вкушаеши на небеси; како подробне исчислити
преславная твоя деяния, от нихже множайшия
утаена суть от мира и единому Богу доведома;
обаче, очима веры зряще тя среди избранных
Божиих и назирающею отонуду нас любовию
твоею побеждаеми, с отрадою и надеждою

взываем ти:

Радуйся, со всеми святыми на небесех
торжествующий;

Радуйся, с ними песнь победную Богу
воспевающий;

Радуйся, духовнаго просвещения светильниче
небосветлый;

Радуйся, милосердия и милостыни источниче
неисчерпаемый;

Радуйся, злобы бесовския мрак преславно
отгоняющий;

Радуйся, человеки от бед и скорбей скоро
избавляющий;

Радуйся, блуждающих по морю жития сего
мудре окормляющий;

Радуйся, к гавани спасения всех нас с любовью
направляющий;

Радуйся, преподобне отче Киприане, чудотворче
и дивный молитвенниче о душах наших.

Кондак 13

О предивный угодниче Христов, преподобне
отче наш Киприане, прими малое сие моление
наше в похвалу от благодарных сердец тебе
возносимое, и предстоя ныне в славе пред
Престолом Царя царей, Господа нашего Иисуса
Христа, пред лицом Заступнице Небесней рода
христианскаго, Всепетой Матери нашей, молися
о всех нас: проси, святче Божий, да обрящем во

спасение милосердие Их на земли и сподобимся
в вечной радости Пресвятей Троице присно
воспевати: Аллилуиа.

(Сей Кондак читается трижды, а затем Икос 1 и
Кондак 1).



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**